

續
文
獻
通
考

續文獻通考卷之九十七

皇明進士雲間王圻纂輯

職官考 留守都護巡察使轉運使安撫使

留守

遼南面五京留守司俱兼府尹職官曰某京留守行某府尹事曰某京副留守曰知某京留守事曰某京少尹曰同知某京留守事曰同簽某京留守事曰某京留守判官曰某京留守推官

金諸京留守司留守一員正三品帶本府尹兼本路兵馬都總管副留守一員從四品帶各府少尹兼本路兵馬副都總管留守判官一員從五品都總管判官一員從

五品掌紀綱總府衆務分判兵案之事推官一員從六品掌同府判分判刑案之事上京兼管林木事司獄一員正八品 正隆二年八月罷上京留守同

元大都留守司秩正二品掌守衛宮闕都城調度本路供億諸務兼理營繕內府諸邸都宮原廟尚方車服殿廡供帳內苑花木及行幸湯沐宴遊之所門禁關鑰啟閉之事留守五員正二品同知二員正三品副留守二員正四品判官二員正五品經歷一員從六品都事二員從七品管勾承發架閣庫一員正八品 至元十九年罷宮殿府行工部置大都留守司兼本路都總管知少府監事 二十一年別置大都路總管府治民事并少

府監歸留守司 皇慶元年別置少府監 延祐七年
罷少府監復以留守兼監事所屬附見

修內司秩從五品領十四局人匠四百五十戶掌修建
直長五員吏日照磨各一員 中統二年置至元中增
工匠計一千二百七十有二戶 大木局提領一員管
勾三員掌殿閣營繕之事 小木局提領二員同提領
一員副提領三員管勾二員提控四員 泥廈局提領
八員管勾二員 車局提領二員管勾一員 粧釘局
提領二員同提領二員 銅局提領同提領各一員管
勾一員 竹作局提領二員提控一員 繩局提領二
員

祇應司秩從五品掌內府諸王邸第異巧工作修禳應
辦寺觀營繕領工匠七百戶大使一員從五品副使一
員正七品直長三員正八品初建兩京殿宇始置司以
備工役其屬附見 油漆局提領五員同提領副提領
各一員掌兩都宮殿髹漆之工 畫局提領五員管勾
一員掌諸殿宇藻繪之工 銷金局提領一員管勾二
員掌諸殿裝鋏之工 裱糊局提領一員掌諸殿宇裝
潢之工 燒紅局提領二員掌諸宮殿所用心紅顏料
器物局秩從五品掌內府宮殿京城門戶寺觀公廨管
繕及御物各位下鞍轡忽哥轎子帳房車輛金寶器物
凡精巧之藝雜作工匠無不隸焉大使一員從五品副

使一員正七品直長二員正八品其屬附見 鐵局提
領管勾各三員提控一人掌諸殿宇輕細鐵工 減鐵
局管勾 員提控二人掌造御用及諸宮邸繫腰 盒
鉢局提領二員掌製御用繫腰 成鞍局提領三員掌
造御用鞍轡象轎 羊山鞍局提領提控各一員掌造
常課鞍轡諸物 綢局提領二員管勾一員掌成造宮
殿綢扇之工 刀子局提控二員掌造御用及諸宮邸
寶貝佩刀之工 旋局提領二員掌造御用異樣木植
器物之工 銀局提領一員掌造御用金銀器盒繫腰
諸物 轎子局提領一員掌造御用異樣木植鞍子諸
物 採石局秩正七品大使副使各一員掌夫匠營造

內府殿宇寺觀橋牌石材之役

大都城門尉詳見中書省城門郎下 犀象牙局秩從

六品大使副使直長各一員司吏一人掌兩都宮殿營繕犀象龍床卓器繫腰等事管匠戶一百有六十其屬附見 雕木局提領一員掌宮殿香閣營繕之事 牙局提領管勾各一員掌宮殿象牙龍床之工

大都四窰場秩從六品提領大使副使各一員領匠夫三百餘戶營造素白琉璃磚瓦其屬三 南窰場西窰場琉璃場大使副使俱各一員 凡山採木提舉司秩從五品掌採伐車輛等雜作木植及造只孫繫腰刀把諸物達魯花赤提舉各一員並從五品同提舉一員正

七品副提舉一員正八品吏目一員司吏一人 上都
採山提領所秩從八品提領副提領提控各一員 至
元九年以採伐材木鍊石爲灰徵發夫匠一百六十三
戶置官以統之 凡山宛平等處管夫匠所提領同提
領各二員管領催車材戶提領一員 器備庫提點一
員從五品大使一員從六品副使一員正七品直長四
員正八品掌閣殿金銀寶器二千餘事 甸皮局大使
一員正七品歲辦熟造紅甸羊皮二千有奇 上林署
并所屬詳見司農卿 儀鸞局掌殿庭燈燭張設之事
及殿閣浴室門戶鎖鑰苑中龍舟圈檻珍異禽獸給用
內府諸宮太廟等處祭祀庭燎縫簾幙灑掃掖庭領燭

刺赤水手樂人禁蛇人等二百三十餘戶輪直怯薛大
使四員正五品副使二員從六品直長二員正八品
延祐七年增大使二員以宦者爲之領燭刺赤水手針
工臘燭四提領所 木場提領大使副使各一員掌受
給營造宮殿材木 大都路管領諸色人匠提舉司掌
大都諸色匠戶理斷婚田詞訟事提舉一員從五品同
提舉一員正七品副提舉一員正八品 真定東平保
定宣德大名晉寧懷慶大同河間諸路各路設管匠官
大使副使不等 汝支庫諸色人匠太廟收支諸物庫南
寺北寺收支諸物二庫各置大使副使或多提點提領
等官不等 廣誼司總和顧和買賣營繕織造供億工役

物色之務司令二員正三品同知二員正四品副使二員正五品判官二員正六品經歷知事各二員照磨一員

上都留守司兼本路都總管府品秩職掌如大都留守司而兼治民事車駕還大都則領上倉諸倉庫之事留守六員正二品同知二員正三品副留守二員正四品判官二員正五品經歷二員都事四員照磨兼管勾一員初置開平府 中統四年改上都路總管府 至元三年又給留守司印十九年併爲上都留守司兼本路都總管府其屬附見 修內司大使一人副使三人直長三人掌營修內府之事 祇應司掌粧鑾油漆裱糊

之事設官同上少副使一人 器物局掌造鐵器內府
營造釘線之事使副各一人直長二人 儀鸞局大使
二人副使三人直長二人 兵馬司指揮使三人副指
揮使二人知事提控各一人 警巡院設官詳司隸校
尉目下 平盈庫使副各一人 萬盈庫達魯花赤監
支納大使副使各一人 廣積倉設官同上 萬億庫
達魯花赤提舉同提舉副提舉各一人提控一人 行
用庫使副各一人 稅課提舉司提舉二人同提舉副
提舉提控各一人 八作司達魯花赤提領大使副使
各一人 餼廩司使副各一人掌諸王駙馬使客飲食
皇明置留守司正留守一人副留守二人指揮同知二人

其屬經歷司經歷一人都事一人斷事司斷事一人副
斷事一人吏目一人司獄司司獄一人其提領提舉儀
鸞祇應等官則分統于六部諸衙門詳見後

留守掌中都興都守護防禦之事副留守指揮同知爲
之貳凡諸政務如都指揮使司經歷斷事司獄亦如之
都廂

遼金無考

元世祖至元二十一年置東關廂巡檢司秩從九品巡檢
三員司吏一人掌巡捕盜賊奸宄之事西北南關廂巡
巡檢司設置並同上隸管領諸路打捕鷹房總管府
皇明不設其緝補諸務皆統于五城兵馬司

都護

遼金皆不設

元世祖至元十七年置鎮北庭都護府于畏吾境以脫脫才兒等領其事秩從二品掌領舊州城及畏吾兒之居漢地者有詞訟則聽之大都護四員從二品同知二員從三品副都護二員從四品經歷一員從六品都事一員從七品至元十一年初置畏吾兒斷事官秩三品十七年改領北庭都護府秩二品置官十二員二十年改大理寺秩正三品二十二年復爲大都護品秩如舊

皇明不設惟

世宗幸承天以郭勳爲都護大將軍

巡察按察巡撫等使

宋寧宗嘉定九年彭龜年請併省監司官其畧曰臣竊考
監司之官蓋源流於秦以御史監郡然漢初猶惡其繁
遂以丞相長史分刺諸州不立常員逮世宗時始置十
二部刺史亦不過一部一人而已本朝遵之其始逐路
止置轉運使一人惟京東西河東北淮南兩浙乃有使
副若糾察刑獄則命轉運司一常叅官掌之自淳化而
後逐路置提刑之官然或置或不置猶不爲常庶豐以
來朝廷命使始紛紛矣蘇軾嘗論其弊譬之立厩長而
馬益羶蓋善諭也紹興間雖未嘗大有所更革然所在
監司多不備置或以一員而兼領亦不聞有所闕敗則

天下之治亂係乎監司之賢否不係乎多寡可槩見矣
臣竊觀近日監司皆無關員間有一事而分爲兩司一
司而轄以二人者其間職掌不同好惡亦異外假舉刺
內示趨向同一訟也而有是非焉同一吏也而有能否
焉號令難於奉行往來疲于迎送蓋不止如蘇軾之所
論其爲害豈細哉臣欲望陛下考祖宗創立之規監紹
興權宜之意將所在監司或省或併間總于一員或文
或武不必於並置庶幾州縣之吏易於趨向朝廷政令
有所總一而員數不多尤易選賢如姚崇所謂今止擇
十使猶患未盡得人此尤當深察也

理宗寶祐二年正月詔工部尚書陳德毅訪察官吏於荆

蜀江淮於是被黜者凡百十七人

遼南面有按察諸道刑獄使有分決諸道刑獄使官不常設有詔則選才望官充之

金按察使本提刑司 大定二十九年章宗命提刑司除後于便殿聽旨每十日使副內一人入見議事如止一員則令判官入見八月定提刑司三十三條 明昌二年勅提刑司五日一朝三年宰臣請罷提刑司不聽復定提刑司條制 承安三年以上京東京等提刑司并爲一提刑使兼宣撫使勸農採訪事爲官稱副使判官以兼宣撫副使判官爲名復改宣撫爲安撫各設安撫判官一員提刑一員通判四員安撫使掌鎮撫人民議

察邊防軍旅審錄重刑事安撫判官則街內不帶勸農
採訪事今專管千戶謀克安撫使副內差一員于咸平
一員于上京分司四年罷咸平分司使在上京副在東
京各設簽事一員四月改提刑司爲按察司 貞祐三
年罷止委監察採訪使一員正三品掌審察刑獄照刷
案牘糾察濫官汚吏豪猾之人私鹽酒麴並應禁之事
兼勸農桑與副使簽事更出巡按副使正四品兼勸農
事簽按察司事正五品四年又設判官二員從六品
明昌元年以陝西地濶添一員知事正八品三年十一
月改提刑司令史爲書史上京者兼經歷安撫司使
泰和八年十一月省議以轉運使權輕州縣不畏不能

規措錢穀遂詔中都都轉運依舊專管錢穀事自餘諸路按察使並兼轉運使副使兼同知按察並兼轉運副添按察判官一員爲從六品中都西京路按察司官止兼西京路轉運司事遼東路惟上京按察安撫使及按察使依舊署本司事遼東轉運使兼按察副使同知轉運使兼按察司事轉運副使兼按察判官添知事一員知法二員從八品右中都西京並依此置陝西上京兩路設按察司事二員上京按察安撫司事上京東京等路按察司并安撫司使正三品鎮撫人民譏察邊防軍旅之事仍專管猛安謀克教習武藝及令本土純愿風俗不致改易副使二員正四品按察安撫司事正五品

簽按察司事正五品知事兼安撫司事正八品知法四員從八品右按察使于上京副使于東京各路設簽事一員分司勾當惟安撫司不帶勸農字內知事于上京自餘並於兩處分減存設

元

初立提刑按察司四道曰山東山西道曰山北東西道曰河東陝西道曰河北河南道 至元六年以提刑按察司兼勸農事 十三年以省併衙門罷按察司 十四年復置增立八道曰河北淮東道曰淮西江北道曰山南江北道曰浙東海右道曰江南浙西道曰江東建康道曰江西湖廣道曰嶺北湖南道 十五年復增三道

曰江南湖北道曰嶺南廣西道曰福建廣東道 十九
年增西蜀四川道 二十年增海北廣東道改福建廣
東道曰福建閩海道以雲南七路置雲南道以女直之
地置海西遼東道 二十三年以淮東淮西山南三道
隸內臺 二十四年增河西隴右道是年罷雲南道
二十八年改按察司曰肅政廉訪司每道設八員除二
使留司以總制一道餘六人分臨所部如民事錢糧官
吏一切奸弊悉委之歲終省臺遣官考其功效 大德
元年徙雲南行臺於陝西復立雲南道其後遂定爲二
十二道每道廉訪使二員正三品副使二員正四品僉
事四員兩廣海南止二員正五品經歷一員從七品知

事一員正八品照磨兼管勾一員正九品

內八道隸御史臺

山東東西道濟南路置司 山南江北道中興路置司

河東山西道冀寧路置司 淮西江北道廬州路置司

燕南河北道真定路置司 江北淮東道揚州路置司

江北河南道汴梁路置司 山北遼東道大寧路置司

江南十道隸江南行臺

江東建康道寧國路置司 嶺北湖南道天臨路置司

江西湖東道龍興路置司 嶺南廣西道靜江路置司

江南浙西道杭州路置司 海北廣東道廣州路置司

浙東海右道婺州路置司 海北海南道雷州路置司

江南湖北道武昌路置司 福建閩海道福州路置司

陝西四道隸陝西行臺

陝西漢中道鳳翔路置司 西蜀四川道成都路置司

河南隴北道甘州路置司 雲南諸路道中慶路置司

按閩志曰廉訪之職與臺察相表裏詢民瘼察冤滯糾劾諸不職者宋置提刑司設提點刑獄官其職與此畧同然任分而權輕元至元二十年改提刑按察司二十八年改按察司爲肅政廉訪司按治帥府漕司軍民司屬兼照刷諸司文卷遲錯責違慢官吏運司官吏年終按問刷卷亦如之每司廉訪使二員長曰監司次曰大使監司守司次官每年九月分司次年四月還司獨大

使於西廳置分司按治本路司屬闕則次官代之副使
以下分按夏六月冬十二月二次審囚就刷所按路分
司屬上下半年文卷餘不係分按審囚時月安坐視事
元史云至元二十三年立按察司巡行郡縣法除使二
員留司副使以下每歲二月分按十月還司與此稍不
同

順帝至正五年遣使巡行天下時諸道奉使者皆與臺諫
交相掩蔽惟巡京畿道西臺御史定定集賢侍讀學士
蘇天爵糾舉無所避凡興革者七百八十三事糾劾九
百四十三人都人稱天爵爲包拯天爵亦竟以忤時相
罷去

胡粹中曰御史糾正百司肅清庶政者而爲宣撫所奏
罷臺綱陵夷可知矣夫臺憲不足任於是宜撫猶漢
繡衣直指之類耳今諸道宣撫又與臺憲互相掩蔽則
天下庶官舉不足任矣其何以爲國哉舉京畿道興革
七十二事糾劾九百四十九人而諸道無聞焉吏弊之
多民瘼之滋又不言可知也

成宗大德七年遣使宣撫循行諸道並給二品銀印

皇明不專設在內都察院御史分按在外按察司各道分
理詳見各衙門

採訪處置使

遼南向採訪使不常設有詔則選才望官爲之其五京各

設處置使司官曰某京處置使惟南京曰燕京管內處
置使開泰中秦王隆慶嘗居此職又太宗時平灤營三
州設處置使司

金有勸農採訪使以按察使兼之見前

世宗大定十一年上調宰臣曰朕欲遍知天下官吏善惡
故每使採訪其被黜者多宜知勸也若常設訪察恐任
非其人易至生弊是以姑罷之

宣宗承安四年以按察使不兼採訪遂罷平倒別路除授
之制

元不設

皇明不設惟 永樂中遣使採訪民間疾苦尋停罷後另

設巡撫以提督軍務及糧儲營田等事見都察院下

度支營田使

遼金不設

元世祖中統二年初立勸農司以陳邃崔斌陳仲寬粘合
從中爲濱棣平陽濟南河間勸農使李士勉陳天錫陳
膺武忙古帶爲邢洛河南東平涿州勸農使 至元十
九年置大都督兵農司于西京

順帝至元六年置都水庸田使司于平江旣而罷之 至
正五年復立十年置河南江北等處都總制庸田使司
使二人副使二人僉司六人經歷都事各二人照磨兼
勾管承發架閣一人所轄軍民屯田總管府五又有農

正司置農正一人農丞一人提領一人豐盈庫提領大
使副使各一人十二年因海運不通京師缺食詔河
南窪下水泊之地置屯田八處于汴梁添立都水庸田
使司秩正三品掌種植稻田之事置營田使二人副使
二人僉事二人首領官經歷知事照磨各一人又詔于
水田去處置大兵農司招誘夫丁有事則乘機招討無
事則栽植播種所置司之處曰保定等處大兵農使司
曰河間等處大兵農使司曰武清等處大兵農使司曰
景縣等處大兵農使司其屬有兵農千戶所共二十四
處百戶所共四十八處鎮撫司各一

呈明不設度支統于戶部及藩司營田統于兵工二部而

分理于外者或以巡撫兼或守道都司專管

租庸兩稅戶口使

遼金不設

元至元二十五年置徵理司專治合追錢穀以甘肅叅政
禿烈羊呵僉省吳誠並為徵理司使 至二十八年罷
皇明不設其租稅戶口俱統于戶部在外藩司守道分理
之

轉運使

遼南面有山西路都轉運使司有奉聖州轉運使司有蔚
州轉運使司有應州轉運使司有朔州轉運使司有保
州轉運使司有西山轉運使司官曰某轉運使曰某轉

運副使曰同知某轉運使曰轉運判官

南京奉聖雲蔚等州轉運使皆

聖宗開泰

三年置

金初設轉運司後詔中外惟都轉運依舊專管錢穀自餘

諸路轉運皆兼于按察其都轉運司使正三品掌稅賦

錢穀倉庫出納權衡度量之制同知從四品副使正五

品都勾判官從六品紀綱衆務分判勾案惟南京勾判

兼上林署丞戶籍判官二員從六品

舊止一員承安二年增一員不

許別差專管拘收徵尅等事度支判官二員從六品掌

勾判分判支度案事鹽鐵判官一員從六品都孔目官

二員勾稽文牘知法二員從八品

興定四年以河南路轉運司為節度使

中都增置官吏

元

初置兩淮都轉運鹽使司秩正三品兩淮內附以提舉馬
兒范章專掌鹽課之事 至元十四年始置司於揚州
使二員正三品同知一員正四品副使一員正五品運
判二員正六品經歷一員從七品知事一員從八品照
磨一員從九品 三十年悉罷所轄鹽司以其屬置場
官 大德四年復置批驗所於真州采石等處 鹽場
二十九所每場司倉一員從七品司丞一員從八品管
勾一員從九品辦鹽各有差 呂四場一餘東場餘
中場餘西場西亭場金沙場石港場掘港
場豐利場馬漭場拼茶場角斜場富安場

安豐場 梁垛場 東臺場 河垛場 丁奚場

小海場 草堰場 白駒場 劉莊場 五祐場 新

興場 廟灣場 莞瀆場 板浦場 臨洪場 徐瀆

浦場 批驗所每所提領一員正七品大使一員正八

品副使一員正九品掌批驗鹽引

兩浙都轉運鹽使司秩正三品使二員同知二員運判

二員經歷知事各一員照磨一員 至元十四年置司

杭州 大德三年定其產鹽之地立場有差仍於杭州

嘉興紹興溫台等處設檢校四所專驗袋母過常度、

鹽場三十四所每所司令一員從七品司丞一員從八

品管勾一員從九品 仁和場 許村場 西路場

下沙場 青村場 袁部場 浦東場 橫浦場 蘆
瀝場 海沙場 鮑郎場 西興場 錢清場 三江
場 曹娥場 石堰場 鳴鶴場 清泉場 長山場
穿山場 袋山場 玉泉場 蘆花場 大嵩場
昌國場 永嘉場 雙穗場 長林場 黃岩場 杜
清場 長亭場 龍頭場 天富南監 天富北監
福建等處都轉運鹽使司秩正三品使二員同知二員
運判二員經歷知事各一員照磨一員 至元十四年
始置市舶司領煎鹽徵課之事 二十四年改立鹽運
司 二十九年罷立提舉司 大德四年復為運司徑
隸行省凡置鹽場七所每所司令一員從七品司丞一

員從八品管勾一員從九品 海口場 牛田場 上

里場 惠安場 澤美場 涪州場 泗州場

四川茶鹽轉運司成都鹽井九十五處散在諸郡山中

至元二年置興化四川轉運司專掌煎熬辦課之事
八年罷之 十六年復立轉運司通轄諸課程事 二

十二年置四川茶鹽運司秩從三品使一員同知副使

運判各一員經歷知事照磨各一員置鹽場一十二所

每所司令一員從七品司丞一員從八品管勾一員從

九品 簡鹽場 隆鹽場 綿鹽場 潼川場 遂寧

場 順慶場 保寧場 嘉定場 長寧場 紹慶場

雲安場 大寧場

大都河間等路山東東路都轉運鹽使司設官與兩淮等處同大都嘗以戶部尚書充使山東以中書左右部兼使俱頒分符印巡行郡邑以防私鹽之弊大都河間等路鹽場二十二所設官與前同利國場利民場海豐場阜民場阜財場益民場潤國場海阜場海鹽場海潤場嚴鎮場富國場興國場厚財場豐財場蘆臺場越支場石碑場濟民場惠民場富民場三义沽場山東東路鹽場一十九所設官與前同永利場寧海場官臺場豐國場新鎮場豐民場富國場永阜場利國場固堤場信陽場濤洛場

石河場 海滄場 行村場 登寧場 西由場 高
家港場 王家岡場 河東陝西等處鹽司所屬 解
鹽場管勾一員正九品同管勾一員從九品 河東等
處解鹽提領所正提領一員從八品副提領一員從九
品 安邑等處解鹽管民提領所設官同前 檢校批
驗所 至正二年中書省講究鹽法奏准于杭州嘉興
紹興台溫四處各置檢校批驗所直隸運司專掌批驗
鹽商引目均平袋法稱盤等事每所置檢校批驗官一
人相副官一人 榷茶都轉運使司 元統二年于湖
廣江西置司

皇明

太祖丙午年初置都轉運鹽使司於兩淮吳元年置於兩浙洪武二年置於河東陝西河間長蘆福建五年置四川納谿白渡二鹽馬司及四川茶鹽都轉運司又明年革茶鹽都轉運司十三年定都轉運司正四品後改從三品鹽課提舉司國初已漸增設建文中改廣東鹽課司爲都轉運鹽使司又有煎鹽提舉司制如府

都轉鹽運使司都轉運使一人同知一人副使一人判官無定員其屬經歷司經歷一人知事一人庫大使一人副使一人所屬衙門鹽課司批驗所鹽倉各大使一人副使一人

都轉運使掌鹺事以聽於戶部同知副使判官爲之貳

凡常股存積之鹽以時征而貯之以待商人種支以供
邊儲京帑之用凡分司鹽課司鹽倉批驗所各以僚屬
分任其事而都轉運使總領之糾禁私煎私買賣窩買
窩諸奸與謹受巡鹽御史之政令而申勵焉經歷典出
納文移知事佐之

鹽課提舉司提舉一人同提舉一人副提舉無定員其
屬吏目一人庫大使一人副使一人所屬衙門鹽課司
批驗所監倉各大使一人副使一人

提舉掌鹽課之事以聽於戶部其職如都轉運使僚屬
亦如之

安撫使

宋安撫使設立之詳見貴與考然僚屬有不盡載茲并存之
叅議官一員添差叅議官一員紹興間置釐務隆興間省軋道間復置不釐務 主管機宜文字幹辦公事各一員主管書寫機宜文字一員 建炎三年置後省 准備差遣五員紹興初置八年改一員作幹辦公事後盡省准備差使五員紹興初置後盡省 措置招捉盜賊官一員紹興十五年置後省

遼北面邊防官控制西夏者有西南面安撫使司官曰西南面安撫使控制東路者有九水諸夷安撫司官曰九水諸夷安撫使俱見前諸路將官內南面東京有安撫使司官曰東京安撫使

金初名宣撫後改宣撫爲安撫以按察司官兼領詳見按察使內 承安四年罷宣撫使詎議官

元松潘容慶威茂州等處有軍民安撫使司隸宣政院秩正三品達魯花赤一員安撫使一員同知一員僉事一員經歷知事照磨各一員鎮撫一員威州保寧縣茂州文山縣文川縣皆隸焉 靜州茶上必里溪安鄉等二十六族軍民千戶所達魯花赤一員千戶一員 龍木頭都留等處二十二族軍民千戶所達魯花赤一員千戶一員 岳希蓬羅蔔村等處二十二族軍民千戶官同上 折藏萬戶府達魯花赤一員萬戶一員 碣門魚通黎雅長河河西寧遠等處軍民安撫使亦隸

宣政院秩正三品達魯花赤一員安撫使一員同知一

員副使一員經歷知事昭磨各一員鎮撫二員至元

二十九年廣西安撫使賽甫丁有罪誅之各處安撫

使官秩大畧皆同師壁洞不置達魯花赤永順等處散

毛洞以上隸四川省羅番遏蠻軍不置達魯花赤程番武盛軍

金石番太平軍臥龍番南寧州小龍番靜蠻軍不置

同知副使大龍番應天府洪番永盛軍方番河中府

蘆番靜海軍不置知事新添葛蠻以上隸湖廣省

忠義軍民安撫司至正十五年四月罷四川羊母甲

洞臭南王洞長官司置忠義軍民安撫司又罷盤順府

置盤順軍民安撫司又罷四川省所轄大奴管勾等洞

長官司立忠孝軍民安撫司

團練安撫勸農使司 至正十八年置奉元延安等處
置司於耀州鞏昌等處置司於邠州以行省丞相朶朶
行臺大夫完者帖木兒領之各設叅謀一人每道置使
二人同知副使各二人檢督六人經歷知事照磨各一
人

皇明國初設安撫司正官有安撫同知副使僉事各一員
首領官有知事一員皆係土官襲替

續文獻通考卷之九十七終

續文獻通考卷之九十八

皇明進士雲間王圻纂輯

職官考

都提舉

諸提舉

經畧使

發運使

總制使

鎮撫使

節度使

都提舉

遼金無

元有都提舉萬億寶源庫

都提舉萬億廣源庫

都提

舉萬億綺源庫

都提舉萬億賦源庫四庫俱置都提

舉正四品提舉同副提舉知事提控等員職掌詳見戶

部之屬

諸路寶鈔都提舉司置達魯花赤都提舉俱

正四品副達魯花赤提舉同副提舉等員更置知事照

磨鍊戶部

諸路寶泉都提舉司 至正十年置掌鼓鑄至正銅錢
印造交鈔設官未詳其屬有鼓鑄局永利庫 常湖等
處茶園都提舉司正四品設官視諸路寶鈔少副達魯
花赤都提舉別置提控都目隸宣徽院 管領六盤山
等處怯憐口民匠都提舉司置達魯花赤都提舉同副
提舉知事提控等員隸中政院秩正四品

遼陽等處金銀鐵冶都提舉司正四品設官同上少達
魯花赤知事提控等員隸中政院 檀景等處採金鐵
冶都提舉同秩四品置提舉同副提舉隸戶部

諸提舉

遼無提舉職官

金提舉南京路權貨事提舉從五品同提舉從六品勾當
官三員正九品員祐五年置提舉倉場司使從五品副
使從六品掌出納公平及毋致虧販監支納官八品十
六員以年六十以下庶幹人充女直漢人各一 廣盈
倉 豐盈倉 永豐倉 儲用倉 富國倉 廣衍倉
三登倉 常盈倉 西一場 西二場 西三場

東一場 東二場 南一場 北二場 通濟倉與在
京倉置監支納使副各一員 豐脩倉 豐贍倉 潼
關倉與定五年初置潼關倉監支納一員兼樞密彈壓
陳州倉四員 侑川倉二員 提舉議察使正五品

副使從五品陝西一員河南一員

秦藍兩關提舉從五品同提舉正六品南遷後置

規措京兆府耀州三白渠公事規措官正七品掌灌溉

民田點檢渠堰官一員掌點檢啓閉涇陽等縣渠堰司吏

又三門集津南北岸提舉一員正六品南遷後置

山東鹽使司與寶坻滄解遼東西京北京凡七司使一

員正五品他司皆同副使二員正六品他司皆一員判官三

員正七品掌幹鹽利以佐國用管勾二十二員正九品

寶坻解西京六員北京遼東滄州四員同管勾都司監皆省掌分管諸場發買收納

恢辦之事同管勾五員都監八員監同各七員知法一

員

元隨處隨事皆立提舉司長官設達魯花赤或不置有都
提舉提舉同提舉副提舉不俱置秩高者四品至五品
早者六品七品至八品餘更置知事提控照磨吏目都
目亦不俱置或轄諸司或更隸別衙其別隸者既詳著
本門茲復以其類彙爲篇俾覽者得便於考云 新運
糧提舉司置達魯花赤都提舉俱正五品同副提舉吏
目各一人 提舉富寧庫從五品提舉左右八作司從
五品提舉都城所正六品各置提舉同副提舉八作多
吏目都城多吏日照磨富寧隸戶部餘隸工部 提舉
備用庫置達魯花赤提舉大使提控等員隸內宰司大
都宣課酒課二提舉司品秩設官俱同提舉富寧庫隸

戶部職掌詳見本屬 大都陸運提舉司從五品置提
舉并副吏目等員隸兵部職掌見本屬 諸織染人匠
提舉司從七品置達魯花赤提舉同提舉副提舉吏目
等員 諸織染提舉司從五品設官同上或不置達魯
花赤或止設提舉或設照略案牘 諸雜造人匠提舉
司 諸色人匠提舉司從五品設官俱與諸織染人匠
提舉司同 梵像提舉司品秩設官俱與富寧庫同
出蠟局提舉司設官與佛像司同 旋匠提舉司從五
品撒答刺欺提舉司正五品各置提舉副提舉旋匠少
提控以上俱隸工部 各處屯田打捕提舉司從五品
設官與織造人匠同隸淮東西屯田打捕總管府 龍

慶栽種提舉司品秩設官同上少吏目 弘州種田提
舉司從六品設官同上有直長無吏目俱隸宣徽院
詣田賦提舉司正五品置達魯花赤或不置提舉同副
提舉等員 諸稻田提舉司 宣農提舉司平江善農
提舉司俱從五品 荆襄等處濟農香戶提舉司正五
品設官俱同田賦提舉司荆襄多司今俱隸隆禧等總
管府 醫學提舉司從五品置提舉副提舉等員職掌
詳見本局 官醫提舉司視醫學多同提舉隸太醫院
職掌詳見本局 玉局正七品 金銀器盒局 陽山
瑤瑤局俱從五品各置提舉同副提舉陽山少副 宣
德隆興等處瑤瑤人匠提舉司置提舉副提舉正六品

俱隸諸路金玉工匠總管府 高麗提舉司從五品置
提舉 織佛像提舉司從五品置提舉副提舉俱隸大
都等路民匠總管府 異樣紋紡提舉司 綾錦織染
提舉司 紗羅提舉司俱從五品俱置提舉同副提舉
隸異樣局總管府 在京提舉司隸中政院總管府
管民提舉司置達魯花赤提舉同副提舉秩從五品屬
打捕鷹房民匠等戶總管府 廣濟提舉司設官同管
民隸詹事院典醫監 諸財賦提舉司置達魯花赤提
舉同副提舉提控都目屬江淮等處財賦總管府 成
製提舉司從五品設官同財賦少提控隸諸色人匠都
總管府 各處寶泉提舉司至元十一年置凡九所江

浙江西湖廣行省各一所所轄有銅冶場凡三各置提
領七位副使一人掌浸銅事

廣東鹽課提舉司至元十三年始從廣州煎辦鹽課十
六年隸江西鹽鐵茶都轉運司二十二年併入宣慰司
二十三年置市舶提舉司 大德四年改廣東鹽課司
提舉一員從五品同提舉一員從六品副提舉一員從
七品鹽場十三所每所司令一員從七品司丞一員從
八品管勾一員從九品典史一員 靖康場 歸德場
東莞場 黃田場 香山場 姓峒場 雙恩場
咸水場 漆水場 石橋場 隆井場 招收場
小江場

廣海鹽課提舉司至元三十一年置專職鹽課秩正四品都提舉二員從四品同提舉二員從五品副提舉二員從六品知事一員提控案牘二員

順帝至元三年二月丙子立船戶提舉司十處提領二十處定船戶科差船一千料之上者歲納鈔六錠以下遞減凡山採木提舉司秩從五品掌採辦車輛等雜作木植及造只孫繫腰刀把諸物達魯花赤提舉同提舉副提舉吏目各一員屬大都留守司 大都管領諸色人匠提舉司秩從五品掌大都諸色匠戶理斷婚田詞訟等事提舉同提舉副提舉吏目各一員屬大都留守司大同路軍器人匠提舉司詳見武備考 平陽保定

蔚州宣德東平等路軍器人匠各提舉司 上都大
通州薊州甲匠各提舉司 大都弓匠提舉司以上俱
隸軍器監 怯憐口皮局人匠提舉司隸利用監 大
都河道提舉司隸都水監 上都稅課提舉司隸上都
留守 上都萬億庫提舉司隸上都留守

皇明

戶部設寶鈔提舉司提舉 工部設大通關提舉司提
舉 南戶部設龍江提舉司提舉 各布政司設 河
渠提舉司提舉同提舉副提舉 衛河提舉司提舉副
提舉 清江提舉司提舉副提舉 鹽課提舉司提舉
副提舉吏目 市舶提舉司提舉吏目

都大提舉茶馬

遼金無

元置常湖等處茶園都提舉秩正四品掌常湖二路茶園
戶二萬三千有奇採摘茶芽以供內府隸宣徽院建置
官秩俱見本院 提領所七俱受宣徽院劄付掌九品
印詳見宣徽院 建寧北苑武夷茶場提領所直隸宣
徽詳見宣徽院

皇明設茶馬司批驗茶引所官見征權下

都大提舉坑冶

遼金無

元置遼陽等處金銀鐵冶都提舉司秩正四品都提舉一

員同提舉一員副提舉一員提控案牘一員譯史一人
吏六人奏差二人掌辦金銀砒鐵等課分納中書省及
中政院七年以其職盡歸中宮 檀景等處採金鐵冶
都提舉司提舉一人餘同上少提控案牘一人掌各冶
採金煉鐵榷債以資國用隸戶部

皇明不設遇開採時另差內使或撫按二司官管理見征
榷下

提舉市舶

遼金無

元至元二十三年立鹽課市舶提舉司隸廣東宣慰司三
十年立海南博易提舉司 至大四年罷之禁下番船

七
隻 延祐元年弛其禁改立泉州廣東慶元三市舶提
舉司每司提舉二員從五品同提舉二員從六品副提
舉二員從七品知事一員

皇明置市舶提舉司 洪武初設太倉黃渡市舶司尋罷
又設於福建浙江廣東七年九月罷後復設

市舶提舉司提舉一人副提舉二人其屬吏目一人所
屬衙門驛丞一人

提舉掌海夷朝貢市易之事副提舉爲之貳辨其使人
表文勘合之僞禁通番征私貨關其出入而慎館穀之
吏目典出納文移驛丞寓夷使僕置其食餼帳幕而上
下其等必周防之

提舉學事司

遼金無

元大都路提舉學校所隸大都路兵馬都指揮使司秩正六品提舉一員教授二員學正二員學錄一員至元二十四年既立國學以故孔子廟爲京學而提舉學事者仍以國子祭酒繫銜其各處行省所署之地皆置儒學提舉司統諸路府州縣學校祭祀教養錢糧之事及考校呈進著述文字每司置提舉副提舉各一人吏屬吏目一人司吏二人

蒙古提舉學校官

元惟江浙湖廣江西三省有之餘省不置提舉同提舉各續文獻通考

卷之九十八

一人

皇明初以御史提舉學校後改按察司官專督而兩京用御史如故遂爲定例詳見按察司

官醫提舉司

元惟河南江浙江西湖廣陝西五省各立一司餘省不置提舉同副提舉各一人掌醫戶差役詞訟至元二十五年立

皇明不設其事皆統于太醫院及在外醫學

提舉弓箭手

遼金無

元世祖中統五年險郡邑民衆寡置馬步弓手夜遊邏禁

人出遠者有罪皆以防盜也而京師南北兩兵馬司各至千人郡邑相距遠村落有邸舍可居停者亦置之每百戶取中產者一人以充盜發期一月獲不獲期兩月三月一不獲則笞之至再至三則笞加多官有綱運若流徙者至則執兵伏導從以轉授受外此則不敢役示其捕盜職

制置使

宋寧宗嘉定十四年五月甲寅朔初置沿江制置副使於鄂州秋七月戊戌以京東河北諸州守臣告付京東河北節制司

遼聖宗時南面邊防設制置司于建霸宜泉錦五州謂之

五州制置使司 金元無

皇明不設

經略使

遼金無

元至正十八年九月初六日命經畧使問民疾苦招諭叛
逆果有怙終不悛者罪之總督大小官吏治兵哀粟精
練士卒審用成筭申明紀律先定江西湖廣江浙福建
諸處併力犄角務收平復之效不尚屠戮之威江南各
省義民忠君親上姓名不能上達者優加撫存量才驗
功授以官爵旌表孝子順孫義夫節婦高年耆德常令
有司存恤鰥寡孤獨選官二員爲經畧使參謀官辟名

士一人掌案牘設行軍司馬一員秩正五品掌軍律
皇明不專設有兵事則暫勅行事

世宗嘉靖中以易州昌平州通爲三輔各置經畧使一員
以文臣領之尋罷

今上萬曆中倭侵高麗上表請援上命都御史以經畧
往督兵事事平令回院管事

發運使

遼無

金漕運司提舉一員正五品景州刺史兼領掌河倉漕運
之事同提舉一員正六品勾當官從八品掌催督起運

綱船司吏六人押綱官七十六人景州依此置肇州以提舉兼本州

同知同提舉兼州判

元世祖中統二年初立軍儲所尋改漕運所 至元五年
改漕運司秩五品 十二年改都漕司秩四品 十九
年改京畿都漕運使司秩正三品掌凡漕運之事至二
十四年分立都漕運司於河西務乃止領在京諸倉出
納糧斛及新運糧提舉司站車攢運公事其在河西務
者掌御河上下至直沽河西務李二寺通州等處備運
糧斛各置運使二人正三品同知二人正四品副使二
人正五品判官二人正六品又 至正二年添設提調
官運副運判各一人 至正九年添設海道巡防官給
降正七品印信掌統領軍人水手防護糧船巡防官二

人相副官二人首領經歷知事各一人提控案牘二人
其吏屬令史等人不一 新運糧提舉司 至元十六
年始置管站軍二百五十輛初隸兵部開設運糧填河
改隸戶部仍屬京畿漕運使置達魯花赤提舉同提舉
副提舉各一人吏目一人 京師二十一倉秩正七品
各置監支納一人大使副使一人 通惠河運糧千戶
所秩正五品掌漕運之事 至元三十一年始置中千
戶一員中副千戶二員

分立都漕運司所屬七十有五 河西務十四倉秩正
七品 通州十三倉秩正七品 河倉一十有七用從
七品印直沽廣通倉秩正七品 棗陽等綱凡三十押

綱官二員計六十員秩正八品每編船三十隻爲一綱
船九百餘隻運糧三百餘萬石船戶八十餘戶綱官以
常選正八品爲之

海道運糧萬戶府 至元二十一年置掌每歲海道運
糧供給大都達魯花赤萬戶各一員副將戶四員經歷
知事照磨各一員鎮撫二員 海運千戶所達魯花赤
一員千戶二員副千戶二員置溫台慶元紹興杭州嘉
興昆山崇明常熟江陰等處凡五所而平江又有海運
香沙糯米千戶所隸萬戶府

防禦海道運糧萬戶府 至元十五年以台州海道巡
防千戶所陞置分府于平江

皇明

國朝漕運不設提舉特置總督都御史專理其事總兵官
催餉而把總等官分任運務其儲運舊用戶部郎中今
用御史三月奏差押運舊用叅將協同今以叅政領之
各府州縣監兌則用戶部主事每歲于漕運議事畢選
差請 勅分詣山東河南直隸浙江江西湖廣督軍民
有司依期交兌催餉起程南運督至儀真與儲運官交
接明白即將各兌完起程并交接日期報部查考回日
仍將兌完日期具奏又差刑戶主事一員理刑三歲一
代以至管倉管閘管河各差戶工二部郎中主事分駐
委理無常貢

欽差總督漕運都御史一人總兵官一人監兌戶部主事
五人僉運監察御史一人押運布政司叅政一人理刑
司部主事一人分運把總官十三人 南京把總官二
員所轄衛三十四指揮二十五員千百戶一百四十二
員 湖廣把總官一員所轄衛一十三指揮一十一員
千百戶八十七員 江西把總官一員所轄衛所一十
一指揮四員千百戶五十八員 浙江把總官一員所
轄衛所一十三指揮八員百戶七十九員鎮撫四員
中都把總官一員所轄衛所一十二鎮撫二員千百戶
八十三員 江北把總官二員所轄衛所一十八指揮
一十五員千百戶一百七十六員 江南把總官二員

上江一員所轄衛所一十一指揮九員千百戶九十九
員下江一員所轄官九指揮二員千百戶十九員 山
東把總官一員所轄衛所七指揮七員千百戶四十七
員 遼洋把總官一員所轄衛一十六指揮十二員千
百戶四十五員

太祖洪武二年至三十年漕東南粟於海以給遼東官軍
初屬靖海侯吳禎後卒遣都督朱壽張赫領之

成祖永樂中遣平江伯陳瑄往湖廣江西等處造船二千
艘以從河運

景皇帝景泰二年始置 欽差總督漕運都御史一員駐
淮安府 命王竑與總兵叅將同理其事

英宗天順二年始設理刑主事一員駐淮安管厰主事二員駐清江浦監倉主事四員分駐淮安臨清徐州德州管河郎中二員分駐安平鎮高郵州管洪主事二員分駐徐州呂梁二洪

憲宗成化二十年始設管開主事二員分駐沛縣濟寧管泉主事一員駐南旺清江浦提舉一員臨清衛河提舉一員僉運糧儲兼鎮守總兵官一員協同漕運叅將一員俱駐淮安二十一年差戶部官五員領勅督同該管糧官依期徵兌

武宗正德六年差侍郎一員僉運七年改委戶部屬官四員分往南直隸江西浙江湖廣地方監兌十五年

差郎中一員自通州沿河一帶直抵儀真等處嚴督軍
衛有司催備供用白糧并漕運京儲等項 又題准天
津兵備副使帶管白河漕運

世宗嘉靖七年議准淮安清江浦管廠指揮聽漕運衙門
填註賢否送戶兵二部與漕運官一體考察 九年題
准運糧官負聽漕運衙門坐名調取不許擅自補換
十四年題准運糧把總衛所總等官每三年一次戶兵
二部會同考察分別去留等第奏請定奪千百戶鎮撫
等官亦三年一次漕運衙門考察南京兵部及各省撫
按衙門遇有申告運官一切患病年老緣事等項必須
會行漕運衙門勘實方許替換各該運官如有侵欺科

擾等項實跡悉聽漕運衙門監兌官并巡按御史指實
叅究黜罰二十一年議准凡各總官三年以上果有
廉能幹濟依期完糧不至借債者准令于實職上陞一
級四十四年題准南直隸浙江江西湖廣等處監兌
官各給關防一顆

穆宗隆慶元年科臣何起鳴言南直隸浙江杭嘉湖添差
御史一員給之制書今專理漕運其濟寧以河南道
舊屬兩淮巡鹽御史帶管者并委之十月漕運都御
史張瀚奏兩浙漕運近多失期乞將東西把總合而爲
一每歲更番一員領運一員預脩次年運務戶部覆浙
江將漕視別省倍加煩劇兩總分任似難變更惟浙江

都司僉書職事頗閒宜委一員 賜之專 勅督理運
務 又漕運總兵等官李廷竹方思馬森張瀚等議裁
革遼洋運糧把總而以所屬淮安大河泗州三衛分屬
江北淮安總高郵楊州二衛屬江北楊州總長淮一衛
屬中都總俱允運南糧以在北德州等九衛與江北淮
安總所屬徐州歸德三衛俱併入山東一總允運山東
河南之糧德州九衛與臨清平山二衛撥運薊州倉糧
徐州等三衛與山東各衛撥運京通天津倉糧其山東
把總每歲將京糧催至白河復督運至薊州 三年題
准兩浙巡鹽御史兼督浙江杭嘉湖三府直隸蘇松常
鎮四府漕務革監兌官 四年議准南京巡屯御史兼

督應天太平寧國安慶池州五府及廣德州糧務 五年差御史詹運 又裁革叅將設叅政一員經理糧船過閘過壩管押到京 又令兩淮巡鹽御史兼督廬鳳淮楊四府及滁徐和三州糧務 六年議准徵寧池太兵協兼管糧務

今上萬曆五年仍差主事一員往蘇松常鎮監兌 六年停差詹運郎中 又令南京二總各衛運官俱與軍政僉書更番領運責成掌印官先期了理仍差南京兵部主事一員兼管選補軍旗事務 九年復差主事一員往浙江監兌 十二年令兩浙巡鹽御史仍帶管漕糧止行文催督免其押送鎮江 二十八年巡漕俱題

准申飭押空糧船漕運儲道選完糧才力指揮一二員
填寫長坐委令隨幫押回不許間道潛歸及在途貿易
諸提領所

元制有油戶麵戶稻田抽分場茶場民佃田賦管民管佃
管夫匠採木萬聖庫寶昌庫大都上都興魯各處打捕
鷹房納綿等戶圓木棋子局軟皮局諸提領所置提領
同提領副提領大使副使等員然有提領與同副提領
並置者有止置提領者有與大使副使並置者秩自七
品至九品分隸諸司詳見本屬

皇明不設

經總制使

遼金無

元世祖至元三年立制國用使司以阿合馬爲使以中書右丞張易同知制國用使司事叅知政事張惠爲制國用副使

皇明不設諸國用經制悉統于戶兵工三部

招討招撫宣諭撫諭諸使

遼北面邊防官有西南面都招討司太祖神冊元年置招討使一員選有功者領之有西南面五押招討司置五押招討大將軍一員有西北路招討司置招討使監軍一員有西北部鎮撫司兼掌西北部軍民置鎮撫事官有西路招討使司置招討使官俱見前諸路將官內南

面雲州設宣諭招撫使司其官曰雲州管內宣諭招撫使二員 統和四年韓毗哥那抱質嘗居此職其邊防官有易州飛狐招安使司有易州飛狐招撫司有西南面招安使司俱見前諸路將官內

金招討司置于西北路西南路東北路三處使一員正三品副使一員從四品招懷降附征討携離判官一員從六品紀綱職務簽判司事勘事官一員從七品知事一員正八品知法二員從八品女直漢人各一

元招討司秩正三品達魯花赤一員招討使一員經歷一

員 土蕃 刺馬剛等處 天全 倂不思 公邊溪

洞 以下各置副使一員無達魯花赤

唆尼 諸番 征沔 朶甘思

長河西裏管軍 檐裏管軍 脫思馬田地

吐番招討司隸宣政院所屬附見 脫思麻探馬軍四

萬戶府秩正三品萬戶五員千戶八員經歷一員鎮撫

一員 脫思麻路新附軍千戶所秩從五品達魯花赤

一員千戶一員副千戶一員 文扶州西路南路底牙

等處萬戶府秩從三品達魯花赤一員萬戶二員 鳳

翔等處千戶所秩從五品達魯花赤一員千戶一員百

戶一員 慶陽寧環等處管軍把總一員 文州課程

倉糧官一員 岷州十八族週廻捕盜官二員 常陽

帖城阿不籠等處萬戶府秩從三品達魯花赤一員千

戶一員 階文扶州等處番漢軍上千戶所秩正五品

達魯花赤一員千戶二員 貴德州達魯花赤知州各一員同知州判各一員脫脫禾孫一員捕盜官一員必呈萬戶府達魯花赤二員萬戶四員

招討軍民萬戶府 至正二十年置鞏縣招討軍民萬戶府二十六年又置嵩州軍民招討萬戶府 軍民府至正十五年命於四川置宣化鎮南五路軍民府立提調軍民鎮撫所總夷軍民千戶所

皇明止設招討軍民等職以待土官詳見下

鎮撫使

宋中興時假權宜置鎮撫使以招收群盜故劇盜李成桑仲郭威輩俱就其所在以爲鎮撫使其餘或以處歸朝

系三廣通志卷之六
之人有大功特與世襲後罷不置

遼金皆無

元行中書省設都鎮撫司置都鎮撫副都鎮撫官又樞密院各萬戶府諸衛立鎮撫所置鎮撫以蒙古漢人叅任幕官則有都目

皇明設土官始于洪武七年西南諸蠻夷來朝貢者多因元官授之稍與約束定糧徭差發曰宣慰使司十一曰招討使司一曰宣撫使司九曰安撫司二十曰長官司百七十三及府州縣正貳幕屬並見夷官考番夷都指揮使司三指揮使司三百三十五宣慰使三招討司六萬戶府四千戶所四十一站七地面七寨一

宣慰使司宣慰使一人同知一人副使一人僉事一人
其屬經歷司經歷一人知事一人宣撫司宣撫使一人
同知一人副使一人僉事一人其屬經歷司經歷一人
知事一人安撫司安撫使一人副使一人僉事一人其
屬吏目一人招討司招討使一人其屬吏目一人長官
司長官一人副長官一人其屬吏目一人蠻夷長官司
長官副長官皆謂之土官撫輯諸蠻謹守疆土修其職
貢而供其差發無敢携貳有相讐者疏上聽于天子
有流官者銓於吏部又有蠻夷官苗民官千夫長副千
夫長百夫長軍民萬戶府經歷司經歷知事並係銓司
有儒學制如府

節度使

遼北面著帳郎君有節度使

見殿中
監目內

所掌非軍民事南面

節度使設官甚衆遼二百餘年城郭相望田野益闢冠
以節度承以觀察防禦團練等使分以刺史縣令大畧
採用唐制其間宗室外戚大臣之家築城賜額謂之頭
下州軍惟節度使朝廷命之後徃徃皆歸王府

上京道

懷州奉陵軍節度使司

慶州玄宰軍節度使司

泰州德昌軍節度使司

長春州韶陽軍節度使司

儀坤州啓聖軍節度使司

龍化州興國軍節度使司

饒州匡義軍節度使司

徽州宣德軍節度使司

成州長慶軍節度使司

懿州廣順軍節度使司

渭州高陽軍節度使司

鎮州建安軍節度使司

東京道

開州鎮國軍節度使司

保州宜義軍節度使司

辰州奉國軍節度使司

興州中興軍節度使司

海州南海軍節度使司

涿州鴨綠軍節度使司

顯州奉先軍節度使司

乾州廣德軍節度使司

貴德州寧遠軍節度使司

瀋州昭德軍節度使司

遼州始平軍節度使司

通州安遠軍節度使司

雙州保安軍節度使司

同州鎮安軍節度使司

咸州安東軍節度使司

信州彰信軍節度使司

賓州懷化軍節度使司

懿州寧昌軍節度使司

蘇州安復軍節度使司

復州懷德軍節度使司

祥州瑞聖軍節度使司

中京道

成州興府軍節度使司

興中府彰武軍節度使司

宜州崇義軍節度使司

錦州臨海軍節度使司

川州長寧軍節度使司

建州保靜軍節度使司

來州歸德軍節度使司

南京道

幽州盧龍軍節度使司

平州遼興軍節度使司

西京道

雲中大同軍節度使司

雲內州開遠軍節度使司

奉聖州武定軍節度使司

蔚州忠順軍節度使司

應州彰國軍節度使司

朔州順義軍節度使司

以上每司設官曰節度使曰節度副使曰同知節度使
事曰行軍司爲曰軍事判官曰掌書記曰衙官

太祖天贊元年分北大濃兀爲二部立兩節度使統之

二年以平州爲盧龍軍置節度使後分幽州平州

聖宗統和二年五國烏隈于厥節度使耶律隗洼以所轄

諸部難治乞賜詔給劍便宜行事從之 十四年改諸

部令穩爲節度使 二十九年置阻卜諸部節度使太

平六年党項別部塌西設契丹節度使領之 八年九

月北敵烈部節度使耶律延壽請視諸部賜旗鼓從之
興宗重熙六年北樞密院言越棘部民苦其酋帥閭長不
法多流亡詔罷越棘等五國酋帥以契丹節度使一員
領之

道宗清寧三年置倒塌嶺節度使 統和五年涅刺部節
度使撒葛里有惠政民請留從之 十二年武定軍節
度使韓德冲秩滿民請留從之 十三年長寧軍節度
使蕭斛里秩滿民請留從之 啓聖軍節度使劉繼琛秩
滿民請留從之 十五年廣德軍節度使韓德疑有善
政民請留從之 開泰九年迭烈德部言節度使韓留
有善政請留命進其治狀

金天會六年詔諸州鎮置節度使一員從三品掌鎮撫諸軍防刺總判本鎮兵馬之事兼本州管内觀察使事其觀察使所掌並同府尹兼軍事管内觀察使同知節度使一員正五品通判節度使事兼州事者仍帶同知管内觀察使副使一員從五品節度判官一員正七品掌紀綱節鎮衆務僉判兵馬之事兼制兵刑工案事觀察判官一員正七品掌紀綱觀察衆務僉判吏戶禮案事通檢推排簿籍知法一員州教授一員正八品 又諸部族亦有節度使一員從三品統制各部鎮撫諸軍餘同州節度副使一員從五品判官一員知法一員元都總管之職蓋節度使也所掌事各不同

皇明置承宣布政使司國初爲行中書省或分中書省六
部尚書徃徃出爲叅知政事叅政入爲尚書 洪武九
年八月 詔改浙江江西福建北平廣西四川山東廣
東河南陝西湖廣山西諸省爲承宣布政使司正二品
十三年改正三品 十五年置雲南布政司 二十
二年改從二品 建文中革左右布政使設布政使一
人堂上官各陞品一級靖難後復故 永樂五年置交
趾布政司 十一年置貴州布政司 宣德三年罷交
趾布政司

本司左右布政使各一人左右叅政各一人左右叅議
各一人叅政叅議因事添設無定員其屬經歷司經歷

一人都事一人照磨所照磨一人檢校一人理問所理問副理問一人提控案牘一人庫局各大使一人副使一人四川有茶馬司大使一人副使一人

布政使掌一省之政叅政叅議爲之貳朝廷有德澤禁令承而播之以先有司三年率府州掌印及首領官朝覲於京師陳其屬吏之臧否而聽去留焉十年造戶版以登民數由數歲貢學生府州縣衛有差三歲鄉試貢士宗室官軍師生以時班祿俸廩糧祀典神祇謹其時祀水旱疾疫災傷請免田租賑貧乏孝弟行義貞烈請表揚之鰥寡孤獨有養凡供邦國之用曰貢曰賦貢有二曰常貢曰暫貢賦有二曰本色曰拆色凡

役二曰力役曰顧役皆視其土地豐瘠人民多寡而會計之下府州縣必均乃已凡出納錢穀必平凡制用必節凡僚屬文武官歲察其臧否而上下其考以報於撫按以達於吏部兵部都察院凡諸政務議定而請於撫按有總督提督亦如之曰清軍曰分守曰督糧曰邊備曰撫民各專事焉官不脩則蕪領之凡 萬壽聖節一人朝賀於京師大婚大喪立 東宮亦如之 天子即位則左布政使來見經歷典出納文移都事佐之照磨典磨勘卷宗檢校佐之理問典刑名凡囚出入謹籍其數以聽於司凡囚必審輕重別其寢處病與餒必報司療而飼之獄之曲直疑允上官下理問則得辯而請焉

日嚴局鑰察械繫副理問提控案牘佐之庫大使副使
典守庫藏局大副使典管繕茶馬司典茶馬交易之事

續文獻通考卷之九十八終